



Giurisdicziun gratuita

Premissas per il dretg

Ina persuna ha il dretg da survegnir la giurisdicziun gratuita (GGrat), sch'ella n'ha betg ils daners necessaris e sche sia pretensiun giuridica na para betg d'esser invana (art. 117 CPC). Ils custs van alura – almain per entant – a donn e cust dal chantun.

Sco povra/basegnusa vala quella persuna che stuess – per finanzia in procedura da meds legals – recurrer ad agens meds finansials actuals, ch'ella dovra absolutamain per cuvrir ils agens custs da viver e quels da sia famiglia. Tgi che desista voluntarmain d'entradas da gudogn currentas u tgi che sa liberescha da sia facultad, na po betg quintar da survegnir la giurisdicziun gratuita. Medemamain n'è nagina basegnusadad avant maun, sche la persuna petenta po far valair ils meds finansials necessaris visavi terzas persunas, p.ex. sch'ella po pretender in pajament anticipà dals custs da process tras la conjugala/il conjugal, sch'ella ha dretgs da mantegniment sco uffant visavi ils geniturs u sche la cuvrada dals custs vegn garantida d'in'assicuranza da protecziun giuridica.

La procedura che la petenta/il petent prevesa sto avair almain ina tscherta schanza da success. Tenor la pratica è ina procedura invana, sch'il privel da perder è cleramain pli grond che las schanzas da gudagnar, uschia che er ina partida cun ina buna basa finansiala na manass, cun raschun, betg la procedura. Ina tala situaziun sto p.ex. vegnir supponida, sche la pretensiun è gia surannada u sch'i n'èn visiblas naginas cumprovas per la pretensiun.

Dimensiun

La GGrat po vegnir concedida per part u dal tuttatfatg e cumpiglia (art. 118 CPC):

- la liberaziun da la prestaziun da pajaments anticipads e da cauziuns,
- la liberaziun dals custs da dretgira,
- la nominaziun giudiziala d'ina assistenza giuridica, sche quai è necessari per defender ils dretgs, en spezial sche la cuntrapartida è represchentada tras ina advocata/in advocat; l'assistenza giuridica po vegnir nominada gia per la preparaziun dal process.

Betg cuvrada da la GGrat n'è percunter il pajament d'indemnisaziuns da partida a la cuntrapartida (art. 122 al. 1 lit. d CPC).

Dumonda

La dumonda da giurisdicziun gratuita po vegnir fatga avant u sunter l'entrada da la litispendenza. Excepziunalmain po la GGrat vegnir concedida retroactivamain. La persuna petenta sto preschentar sias relaziuns d'entradas e da facultad cun ils documents necessaris e s'exprimer tant davart la chausa sco er davart sias cumprovas. En la dumonda po ella designar il num da l'assistenza giuridica giavischada (art. 119 CPC). Sche las indicaziuns èn incumpletas u sche las cumprovas mancan, po la dumonda vegnir refusada.

En la procedura da meds legals sto la GGrat vegnir dumandada da nov.

Procedura e decisiun

La dretgira decida davart la dumonda en la procedura summarica. Cun excepziun da mala fai e da levseinn na vegnan incassads nagins custs da dretgira en la procedura per conceder la GGrat. La cuntrapartida po

vegnir tadlada. Ella sto adina vegnir tadlada, sche la GGrat duai cumpigliar la prestaziun da la segirezza per l'indemnisaziun da partida (art. 119 al. 3 CPC).

Retratga

La dretgira retira la GGrat, sch'il dretg sin quella n'exista betg pli u sche quel n'ha mai existì (art. 120 CPC), uschia en spezial, sch'i sa mussa durant la procedura che sia cuntinuaziun è invana u sche la situaziun finanziaria da la partida è sa meglierada essenzialmain en il fratemp.

Restituziun

Ina partida, a la quala la GGrat è vegnida concedida, sto pajar enavos quella, uschespert ch'ella è en cas da far quai. Il dretg dal chantun surannescha 10 onns suenter la fin da la procedura (art. 123 CPC).

Meds legals

Decisiuns davart il dretg sin la giurisdicziun gratuita, davart la nominaziun d'ina represchentanza legala e davart la fixaziun da sia indemnisaziun ston vegnir communitgadas a las personas pertutgadas. Decisiuns d'istanzas pli bassas èn suttamessas al recurs tar la dretgira chantunala; decisiuns da las parsuras/dals parsuras da las chombras da la dretgira chantunala che mainan las proceduras èn suttamessas als meds legals che resultan da la fatschenta al Tribunal federal.

Midadas da la pratica dals 15 da november 2018

A chaschun da la sesida da la dretgira collectiva dals 15 da november 2018 ha la Dretgira chantunala dal Grischun concludì las suandantas midadas da la pratica che concernan la giurisdicziun gratuita:

[Midadas da la pratica concernent la giurisdicziun gratuita](#)